



BULETINI I KËSHILLIT PROKURORIAL TË KOSOVËS

Shkurt 2024

AKTIVITETET E KËSHILLIT PROKURORIAL TË KOSOVËS

(Në edicionin e këtij Buletini pasqyrohen
aktivitetet e KPK-së për muajin shkurt të vitit
2024)

BULETINI I KËSHILLIT PROKURORIAL TË KOSOVËS

Shkurt 2024

Mbahet ceremonia e dorëzimit dhe pranimit të detyrës së Kryesuesit të Këshillit Prokurorial


Prishtinë, 1 shkurt 2024

Me një ceremoni zyrtare, të mbajtur në Këshillin Prokurorial të Kosovës, është bërë dorëzimi dhe pranimi solemn i detyrës së kryesuesit të KPK-së ndërmjet kryesuesit të deritashëm, z.Jetish Maloku dhe kryesuesit të zgjedhur, z.Ardian Hajdaraj.



Në fjalimin e tij përshëndetës, z.Maloku i uroi suksese kryesuesit të sapozgjedhur, duke theksuar sfidat dhe të arriturat gjatë mandatit të tij trevjeçar dhe, njëkohësisht, falënderoi të gjithë punonjësit e sistemit prokurorial për bashkëpunimin e frytshëm gjatë kësaj periudhe kohore.

Pas pranimit zyrtar të detyrës, Kryesuesi Hajdaraj, duke falënderuar z.Maloku për kontributin, përkushtimin dhe punën e palodhshme gjatë mandatit të tij, nënvizoi se, gjatë punës së tij do të ketë parasysh gjithnjë rëndësinë e pavarësisë së sistemit prokurorial dhe rolin e tij kushtetues e ligjor në shërbim të avancimit të sundimit të ligjit dhe rendit në Kosovë.



Z.Hajdaraj, u zgjodh kryesues në Takimin e 241-të të Këshillit Prokurorial të Kosovës dhe mandati i tij është dyvjeçar (2024-2025).

Mbahet ceremonia e dorëzimit dhe pranimit të detyrës së Zëvendëskryesuesit të Këshillit Prokurorial

Prishtinë, 2 shkurt 2024

Në ambientet e Këshillit Prokurorial të Kosovës, me anë të një ceremonie zyrtare, znj.Jehona Grantolli pranoi detyrën e Zëvendëskryesueses së KPK-së nga z.Veton Shabani, ish-Zëvendëskryesues i Këshillit Prokurorial.



Në fjalën e tij përshëndetëse, z.Veton Shabani uroi znj.Jehona Grantolli që të ketë suksese në pozitën e Zëvendëskryesueses së sapozgjedhur të KPK-së, duke shprehur mirënjohjen e tij për bashkëpunimin, angazhimin dhe përkushtimin e administratës së KPK-së në procesin e punës.



Pas pranimit solemn të detyrës, Zëvendëskryesuesja Grantolli falënderoi z.Shabani për angazhimin e pakursyer të tij dhe kontributin e dhënë për sistemin prokurorial.

Znj.Grantolli u zgjodh Zëvendëskryesuese në Takimin e 241-të të Këshillit Prokurorial të Kosovës dhe mandati i tij është dyvjeçar (2024-2025).

Ndërkaq z.Shabani u zgjodh Kryesues i Komisionit për Vlerësimin e Performancës së Prokurorëve.

Kryesuesi Hajdaraj priti në takim përfaqësuesit e Institutit të Bazelit për Qeverisje

Prishtinë, 2 shkurt 2024

Kryesuesi i Këshillit Prokurorial të Kosovës, z.Ardian Hajdaraj, priti në takim përfaqësuesit e Institutit të Bazelit për Qeverisje, z.Eric Stonecipher dhe Këshilltarin e Lartë Ligjor në UNDP, z.Albert Avdiu, si dhe z.Betim Nimani.

Qëllimi i këtij takimi ishte diskutimi për avancimin e bashkëpunimit të mëtejshëm dhe për bashkërendimin e aktiviteteve që janë në funksion të ofrimit të mbështetjes profesionale për hartimin e akteve të veçanta nënligjore të sistemit prokurorial, siç është draftimi i Rregullores për Zyrën për Rikthimin e Aseteve në Zyrën e Kryeprokurorit të Shtetit.



Me këtë rast, Kryesuesi Hajdaraj falënderoi ekspertët e Institutit të Bazelit për Qeverisje, z. Stonecipher dhe z. Avdiu, për angazhimin dhe mbështetjen në të kaluarën dhe tani, sidomos në fushën e ekspertizës për gjurmimin e pasurisë, bashkëpunimin me institucionet financiare dhe bashkëpunimin ndërkombëtar juridik për arritjen e synimeve për kthimin e pasurisë së fituar përmes veprës penale.



Z. Eric Stonecipher ka uruar z. Hajdaraj për zgjedhjen në pozitën e Kryesuesit të Këshillit Prokurorial të Kosovës, duke shprehur gatishmërinë e plotë që të vazhdohet dhe avancohet bashkëpunimi dhe bashkërendimi i aktiviteteve të planifikuara për vitin 2024.

Gjatë takimit, bashkëbiseduesit u pajtuan për nevojën e angazhimit të ekspertëve të Institutit deri në aftësimin e plotë të zyrtarëve dhe të Zyrës për Rikthimin e Aseteve për kryerjen e detyrave dhe funksioneve të tyre, zyrë kjo, e cila do të asistohet nga Instituti i Bazelit për Qeverisje përmes zgjerimit të fushëveprimit të marrëveshjes aktuale të bashkëpunimit me Institutin e Bazelit për Qeverisje.

Komisioni për Çështje Normative: Formohen grupet punuese për hartimin e katër draftregulloreve

Prishtinë, 5 shkurt 2024

Komisioni për Çështje Normative, i kryesuar nga z. Armend Zenelaj, ka mbajtur takimin e radhës, në të cilin morën pjesë anëtarët, Drejtori i Përgjithshëm i

Sekretariatit të KPK-së dhe përfaqësuesit e UNDP-së dhe Zyrës së BE-së në Kosovë.



Në takim fillimisht është miratuar drafti i Rregulloreve për Themelimin e Zyrës për Rikthimin e Aseteve, që do të ofrojë ndihmë dhe këshilla në gjurmimin e pasurisë, bashkëpunimin me institucionet financiare dhe bashkëpunimin ndërkombëtar në arritjen e synimeve për kthimin e pasurisë së fituar përmes veprës penale. Me këtë rast, kryesuesi e Komisionit, falënderoi partnerët ndërkombëtarë për mbështetjen që kanë dhënë lidhur me draftimin e kësaj rregulloreje dhe komentet e marra gjatë dëgjimit publik janë inkorporuar në draftin që do t'i propozohet Këshillit Prokurorial për miratim.

Po ashtu, Komisioni themeloi grupet punuese për hartimin e akteve normative, të parapara sipas Planit të punës së Komisionit për vitin 2024, kurse në mesin e këtyre drafteve që do të hartohen janë: Rregullorja për Procedurat e Rekrutimit për Pranim në Sistemin Prokurorial, Rregullorja për Klasifikimin e Vendeve të Punës, Rregullorja për Planifikimin e Personelit dhe Rregullorja për Krijimin dhe Përbërjen e Komisionit Disiplinor.

Kryesuesi Hajdaraj priti në një takim njohës përfaqësuesit e Ambasadës Amerikane

Prishtinë, 6 shkurt 2024

Kryesuesi i Këshillit Prokurorial të Kosovës, z. Ardian Hajdaraj, së bashku me Zëvendëskryesuesen znj. Jehona Grantolli, priti në një takim njohës Këshilltarin Rezident Ligjor në Ambasadën Amerikane në Kosovë, z. Erin Cox dhe Zyrtaren e Lartë Ligjore në OPDAT, znj. Benina Kusari.

Në këtë takim njohës, Kryesuesi Hajdaraj, falënderoi përfaqësuesit e Ambasadës Amerikane për angazhimin dhe përkushtimin e madh për t'i ofruar ndihmë sistemit prokurorial, duke theksuar se, bashkërendimi i aktiviteteve të përbashkëta do të vazhdojë më tej, ngaqë ndikon drejtpërdrejt në

avancimin dhe fuqizimin e sundimit të ligjit në Republikën e Kosovës.



Nga ana tjetër, Këshilltari Rezident Ligjor në Ambasadën Amerikane, z.Erin Cox, uroi Kryesuesin Hajdaraj dhe Zëvendëskryesuesen Grantolli për zgjedhjen e tyre në krye të KPK-së.

Të dyja palët shprehën gatishmërinë e tyre për të intensifikuar koordinimin e aktiviteteve të përbashkëta të planifikuara për vitin 2024, duke shprehur gatishmërinë e plotë për jetësimin e tyre.

Kryesuesi Hajdaraj: Projektet dhe aktivitetet e përbashkëta me Zyrën e BE-së ndikojnë në avancimin dhe fuqizimin e sundimit të ligjit në Kosovë

Prishtinë, 7 shkurt 2024

Kryesuesi i Këshillit Prokurorial të Kosovës (KPK), Ardian Hajdaraj, së bashku me Zëvendëskryesuesen e KPK-së, Jehona Grantolli dhe Drejtorin e Përgjithshëm të Sekretariatit të KPK-së, Sami Istrefi, zhvilloi një takim njohës me Shefin e Zyrës së Bashkimit Evropian (BE) në Kosovë, Tomas Szunyog, së bashku me bashkëpunëtorët e tij.



Gjatë këtij takimi, Kryesuesi Hajdaraj, falënderoi shefin e BE-së, Szunyog, për vizitën dhe angazhimin e

vazhdueshëm të Zyrës së Bashkimit Evropian në funksion të fuqizimit të llogaridhënies, transparencës dhe integritetit në sistemin prokurorial në Kosovë.

Me këtë rast, Hajdaraj, tha se bashkëpunimi i afërt dhe bashkërendimi i projekteve dhe aktiviteteve të përbashkëta me Zyrën e BE-së do të vazhdojë më tej, në mënyrë që të kemi rezultate sa më efikase në avancimin dhe fuqizimin e sundimit të ligjit në Republikën e Kosovës.

Shefi i Zyrës së BE-së uroi Kryesuesin dhe Zëvendëskryesuesen për zgjedhjen e tyre në krye të Këshillit Prokurorial, duke potencuar se koordinimi dhe zbatimi i projekteve të përbashkëta ka për qëllim arritjen e progresit të nevojshëm në sistemin prokurorial.

Në fund të takimit të , Hajdaraj dhe Szunyog, shprehën gatishmërinë që përmes angazhimit të përbashkët të ketë rezultate sa më të mëdha që çojnë vendin tonë drejt avancimit në rrugën e integritetit evropian.

Mbahet Takimi i 242-të i Këshillit Prokurorial të Kosovës

Prishtinë, 13 shkurt 2024

Këshilli i Prokurorial i Kosovës (KPK), i udhëhequr nga Kryesuesi Ardian Hajdaraj, ka mbajtur takimin e 242-të, në të cilin janë diskutuar dhe miratuar pikat sipas rendit të ditës.



Të gjitha vendimet që u morën në këtë takim janë si vijojnë, me ç'rast KPK-ja:

- Miratoi Rregulloren për Zyrën për Rikthimin e Aseteve, e cila do të hyjë në fuqi menjëherë;
- Mori vendim për shpalljen e zgjedhjes së anëtarit të KPK-së nga radhët e Prokurorisë Speciale të Republikës së Kosovës dhe themeloi Komisionin për zgjedhjen e anëtarit të ri, në përbërje: Arian Gashi (Prokuroria e Apelit), kryesues, Agron Qalaj (ZKPSH) – anëtar dhe Sami Istrefi (SKPK) – anëtar;

- Zgjodhi prokuroren Sebahate Sinani anëtare zëvendësuese në Komisionin për Vlerësimin e Performancës së Prokurorëve;
- Caktoi prokurorin Arianit Salihu në pozitën e Udhëheqësit të Departamentit të Përgjithshëm në Prokurorinë Themelore në Prishtinë;
- Aprovoi propozimet e kryeprokurorëve të prokurorive themelore në Pejë dhe në Gjakovë për caktimin e prokurores Arlinda Nallbani – Gacaferri dhe prokurorit Kastriot Mema në cilësinë e mentorëve në Akademinë e Drejtësisë së Kosovës;
- Caktoi përfaqësuesen e KPK-së në Grupin punues në hartimin dhe harmonizimin e projektakteve që rrjedhin nga Ligji për Parandalimin dhe Mbrojtjen nga Dhuna në Familje, Dhuna ndaj Grave dhe Dhuna në Baza Gjimore, prokuroren në Prokurorinë Themelore të Prishtinës, znj.Luljeta Bilalli;
- Formoi Grupin teknik për mbështetjen e Komisionit për rekrutimin e prokurorëve të rinj;
- Trajtoi Raportin e Panelit hetimor ndaj një prokurori në Prokurorinë Themelore në Prishtinë, i cili si subjekt hetimi ka kërkuar përjashtimin e një anëtari të KPK-së;
- Anëtarët e KPK-së u njoftuan për pensionimin e prokurorëve gjatë muajit shkurt dhe mars të këtij viti, për të cilët do të dërgohen propozimet në Zyrën e Presidentes për lirim nga detyra.

Kryesuesi i Këshillit Prokurorial, Ardian Hajdaraj, priti në takim shefin e EULEX-it, Giovanni Barbano dhe zëvendëshefen Emily Rakhorst

Prishtinë, 15 shkurt 2024

Shprehja e gatishmërisë së lartë për bashkëpunim në proceset e përbashkëta në mes të Këshillit Prokurorial



të Kosovës (KPK) dhe Misionit të BE-së për Sundimin e Ligjit në Kosovë (EULEX) për çështjet që ndërlidhen me rëndësinë e monitorimit, këshillimit dhe mënyrën e trajtimit të sfidave dhe fuqizimit të sistemit prokurorial, ishin në fokus të diskutimeve në takimin e parë të kryesuesit të KPK-së, Ardian Hajdaraj, me shefin e EULEX-it, Giovanni Pietro Barbano dhe zëvendëshefen e këtij misioni, Emily Rakhorst.

Me këtë rast, Kryesuesi Hajdaraj falënderoi shefin e EULEX-it, Barbano dhe zëvendëshefen Rakhorst, për vizitën në Këshillin Prokurorial dhe i përgëzoi për mandatin e tyre në krye të këtij misioni të rëndësishëm evropian në Kosovë, si dhe e njoftoi për zhvillimet e fundit lidhur me zbatimin e prioritetëve strategjike, rritjen e efektivitetit, transparencës, llogaridhënies dhe ngritjes së besimit të qytetarëve në sistemin prokurorial.

Nga ana tjetër, shefi i EULEX-it, Giovanni Barbano, uroi gjithashtu kryesuesin e KPK-së për detyrën e re, duke shprehur gatishmërinë e tij dhe të stafit që drejton për ofrimin e mbështetjes së mëtutjeshme për KPK-në dhe institucionin e Prokurorit të Shtetit përmes rolit monitorues dhe këshillëdhënës në rrugëtimin e përbashkët drejt fuqizimit të sundimit të ligjit në Kosovë në pajtim të plotë me standardet dhe praktikat më të mira të BE-së.

Ndër të tjera, u bë e ditur se, në kuadër të takimit në mes të z.Hajdaraj dhe z.Barbano, për shkak të rëndësisë së madhe të bashkëpunimit në fushën e sundimit të ligjit dhe luftimin e krimit të organizuar, të dy palët vlerësuan se ekziston vullnet i dyanshëm për të vazhduar dhe për t'u koordinuar aktivitetet e përbashkëta, me qëllim të arritjes së objektivave që ndikojnë në fuqizimin e sundimit të rendit dhe ligjit në Kosovë.

Kryesuesi i Këshillit Prokurorial priti në takim Zëvendësdrejtorin e Qendrës për Rikthimin e Pasurive në Institutin e Bazelit për Qeverisje dhe Ekspertin e Institutit të Bazelit për Qeverisje

Prishtinë, 15 shkurt 2024

Funksionalizimi i Zyrës për Rikthimin e Aseteve në Zyrën e Kryeprokurorit të Shtetit, ishte në fokus të diskutimit në takimin e që zhvilloi Kryesuesi i KPK-së, z.Ardian Hajdaraj, me Zëvendësdrejtorin e Qendrës për Rikthimin e Pasurive në Institutin e Bazelit për Qeverisje, z.Iker Lekuona dhe ekspertin e Institutit të Bazelit për Qeverisje, z.Eric Stonecipher.

Gjatë këtij takimi, Kryesuesi i KPK-së, z.Hajdaraj, falënderoi Zëvendës Drejtorin e Qendrës për Rikthimin e Pasurive, z.Lekuona dhe ekspertin e këtij Instituti, z.Stonecipher, për vizitën, duke i njoftuar për miratimin dhe fillimin e procesit të zbatimit të Rregullores për Zyrën për Rikthimin e Aseteve, e cila do të lehtësojë në mënyrë të dukshme institucionin e Prokurorit të Shtetit në hetimin dhe ndjekjen e veprave penale që kanë të bëjnë me pasuritë e fituara në mënyrë të paligjshme.



Nga ana tjetër, z.lker Lekuona uroi z.Hajdaraj për detyrën e re dhe shprehu gatishmërinë e tij për ofrimin e përkrahjes dhe mbështetjes së plotë për funksionalizimin e Zyrës për Rikthimin e Aseteve dhe për aktivitetet e tjera në fusha të ndryshme të sistemit prokurorial.

Rrjedhimisht, gjatë këtij takimi, bashkëbiseduesit u pajtuan për të vazhduar koordinimin e aktivitetet të këtij viti, me qëllim të arritjes së objektivave me anë të avancimit në fushën e gjurmimit të pasurisë, bashkëpunimit me institucionet financiare dhe bashkëpunimit ndërkombëtar juridik për kthimin e pasurisë së fituar përmes veprës penale.

Kryesuesi i KPK-së, Ardian Hajdaraj, uron të gjithë qytetarët me rastin e 16-vjetorit të Pavarësisë së Republikës së Kosovës

Prishtinë, 16 shkurt 2024

Kryesuesi i Këshillit Prokurorial të Kosovës, Ardian Hajdaraj, ka uruar qytetarët me rastin e 16-vjetorit të Pavarësisë së Kosovës, me ç'rast në urimin e tij thuhet:

Të nderuar qytetarë,

Në emër të Këshillit Prokurorial të Kosovës dhe në emrin tim personal Ju përcjell me ngrohtësinë më të madhe urimet më të mira me rastin e 16-vjetorit të Pavarësisë së Republikës së Kosovës.

Kjo datë historike është pasardhëse e shndritshme e synimeve të gjata për liri, demokraci dhe pavarësi, andaj

me të drejtë lartëson vlerat tona, të theksuara në Deklaratën e Pavarësisë, si një frymëzuese e përhershme.



Dita e Pavarësisë – 17 Shkurti është dhe mbetet dita më e rëndësishme e shtetit tonë të përbashkët, sepse kurorëzoi përpjekjet e jashtëzakonshme që u arritën me sakrificat të panumërta, duke u bërë udhërrëfuese e denjë dhe transmetuese e fuqishme, jo vetëm e vlerave të lirisë sonë, por edhe vlerave të lirisë universale.

Mbahet takimi i radhës i Komisionit për Administrimin e Prokurorive

Prishtinë, 20 shkurt 2024

Komisioni për Administrimin e Prokurorive të KPK-së, i udhëhequr z.Jetish Maloku, pas marrjes së kryesimit të tij këtë muaj, mbaiti takimin e radhës, sipas agjendës së paraparë.



Në takim morën pjesë anëtarët e këtij komisioni, si dhe znj.Stephanie Lefeuvre, eksperte nga Projekti KoSEJ III i KE-së, zyrtarët e Njësitit për Shqyrtimin e Performancës së Prokurorisë dhe zyrtarët e

Sekretariatit të KPK-së, përfshirë Departamentin e Teknologjisë Informative.

Fillimisht janë aprovuar Raporti vjetor i Punës së Komisionit për vitin 2023 dhe Plani i Punës për vitin 2024, kurse ky i fundit është përgatitur konform Planit Strategjik të sistemit prokurorial 2022-2024.

Gjatë takimit u trajtua edhe raporti i ekspertëve të Projektit CEPEJ, i cili përmban ngritjen e kualitetit të të dhënave dhe gjenerimin e raporteve statistikore të prokurorive të vendit në SMIL.

Gjatë takimit janë diskutuar edhe rezultatet e pyetësorit për zbatimin e SMIL-it në Prokurorinë Themelore në Prishtinë, i cili është duke u bërë sipas standardeve për mbledhjen, përpunimin dhe ruajtjen e të dhënave nga SMIL-i, qëllimi të cilit është matja e përshtypjeve të përdorimit të këtij sistemi se sa ka bërë lehtësimin e punës së tyre të përditshme dhe avancimi i SMIL-it sipas kërkesave të prokurorëve dhe zyrtarëve administrativë.

Në përfundim të takimit, u tha se gjatë vitit 2024 do të ketë angazhime të rëndësishme të Komisionit për Administrimin e Prokurorive, sidomos në çështjet lidhur me analizimin e ngarkesës së lëndëve në prokurori, unifikimin i praktikave të punës dhe në zbatimin - shkëmbimin elektronik të të dhënave me institucionet e tjera të zbatimit të ligjit.

Hartohet drafti i Planit Vjetor të Punës së KPK-së për vitin 2024

Prishtinë, 22 shkurt 2024

Sekretariati i Këshillit Prokurorial të Kosovës (SKPK) ka organizuar një punëtori dyditore për hartimin e draftraportit vjetor për vitin 2023 dhe draftplanit të punës për vitin 2024.



Në punëtorinë e kryesuar nga Drejtori i Përgjithshëm i Sekretariatit të KPK-së, z.Sami Istrefi, morën pjesë udhëheqësit e njësive organizative të sistemit prokurorial.

Në sesionet e ditës së parë të kësaj punëtorie, grupi punues ka trajtuar draftraportin vjetor të punës, në kuadër të të cilit është renditur zbatimi i planifikimeve të bëra në vitin 2023.

Ndërsa, në sesionet e ditës së dytë, anëtarët e grupit punues kanë identifikuar dhe hartuar qëllimet e Planit vjetor të punës së KPK-së dhe trupave të saj mbështetëse për vitin 2024, duke u fokusuar në fuqizimin e mekanizmave të kontrollit të integritetit në përputhje me ligjet në fuqi, avancimin e profesionalizmit, llogaridhënies dhe komunikimit të brendshëm dhe të jashtëm, si dhe intensifikimin e dinamikës së punës përbrenda sistemit prokurorial.

Hartimi i Planit vjetor të punës së KPK-së është bazuar dhe derivon nga planifikimi i politikave strategjike të sistemit prokurorial 2022-2024 dhe mbështetët në kompetencat dhe mandatin kushtetues dhe ligjor të Këshillit Prokurorial të Kosovës, plan ky, i cili pas finalizimit do t'i prezantohet Këshillit për miratim.

Mbahet takimi i Komisionit për Vlerësim të Performancës së Prokurorëve

Prishtinë, 23 shkurt 2024

Komisioni për Vlerësim të Performancës së Prokurorëve, i udhëhequr nga z.Veton Shabani, pas marrjes së kryesimit të tij në fillim të këtij viti, ka mbajtur takimin e radhës, sipas agjendës së paraparë.



Në takim morën pjesë anëtarët e këtij komisioni, z.Aleksandër Lumezi dhe znj.Nazan Shero, si dhe koordinatori i Komisioneve të Përhershme të KPK-së, z.Besim Kusari.

Fillimisht, anëtarët e Komisionit i uruan mirëseardhje kryesuesit të ri të Komisionit, z.Veton Shabani, kurse më pas është njoftuar se në kuadër të zbatimit të Programit të punës së Komisionit për vitin 2024 ka filluar vlerësimi i performancës së njëmbëdhjetë (11)

prokurorëve, të cilët përbëjnë grupin e parë të vlerësimit të prokurorëve në vitin 2024.

Po ashtu, gjatë takimit të , anëtarët trajtuan edhe ecurinë e hartimit të Raportit vjetor përmbledhës të vlerësimeve vjetore të kryeprokurorëve për prokurorët e prokurorive të vendit për vitin 2023, proces ky, i cili është në fazën e pranimit të vlerësimeve nga autoritetet kompetente, ndërsa raporti i finalizuar do të procedohet për miratim në njërën nga takimet e Këshillit.

Betohet anëtari i ri i KPK-së nga radhët e profesorëve universitarë të drejtësisë

Prishtinë, 26 shkurt 2024

Këshilli i Prokurorial i Kosovës (KPK), i udhëhequr nga Kryesuesi Ardian Hajdaraj, ka mbajtur takimin e 243-të me radhë, në të cilin janë diskutuar dhe miratuar pikat sipas rendit të ditës.



Në fillim të takimit të është betuar anëtari i ri i Këshillit Prokurorial, Prof.Ass.Dr.Dardan Vuniqi, i cili është zgjedhur nga radhët e profesorëve universitarë të drejtësisë, me ç'rast Kryesuesi Hajdaraj i uroi mirëseardhje, duke i dëshiruar punë të suksesshme në mandatin e tij.

Gjatë takimit, KPK-ja mori këto vendime:

Miratoi Plotësimin dhe Ndryshimin e Vendimit KPK/Nr.148/2024 për themelimin e Komisionit për zgjedhjen e Anëtarit të Këshillit Prokurorial të Kosovës nga Prokuroria Speciale, kryesues i të cilit u zgjodh z.Dardan Vuniqi, siç e parasheh rregullorja përkatëse që duhet të jetë anëtar joprokuror.

Emëroi anëtarin e Këshillit Drejtues në Akademinë e Drejtësisë nga Sekretariati i Këshillit Prokurorial të Kosovës, Drejtorin e Sekretariatit të KPK-së, z.Sami Istrefi, i cili do të ketë mandat katërvjeçar.

Aprovoi kërkesën e Kryeprokurorit të Prokurorisë Themelore të Prishtinës për vlerësimin e jashtëzakonshëm të një prokurori nga e njëjta prokurori.

Refuzoi raportin e Panelit hetimor ndaj një prokurori në Prokurorinë Themelore në Prishtinë, si dhe mori vendim që i njëjti të trajtohet nga Komisioni për Vlerësimin e Performancës së Prokurorëve.

Mbahet takimi i Komisionit për zgjedhjen e anëtarit të KPK-së nga radhët e PSRK-së

Prishtinë, 27 shkurt 2024

Komisioni për zgjedhjen e anëtarit të KPK-së nga Prokuroria Speciale e Republikës së Kosovës, i udhëhequr nga anëtari joprokuror, profesori Dardan Vuniqi, mbajti një takim pune, në të cilin morën pjesë prokurori në Zyrën e Kryeprokurorit të Shtetit, z.Agron Qalaj dhe Drejtori i Përgjithshëm i Sekretariatit të KPK-së, z.Sami Istrefi.



Qëllimi i takimit ishte diskutimi për koordinimin dhe organizimin e mbajtjes së zgjedhjeve për anëtarin e KPK-së nga radhët e Prokurorisë Speciale të Republikës së Kosovës.

Më këtë rast, anëtarët e Komisionit, theksuan se do të respektohet afati i caktuar për mbajtjen e zgjedhjeve për anëtar të KPK-së nga Prokuroria Speciale.

Diskutohet për realizimin e projekteve dhe mbështetjen e mëtejshme të EUKOJUST-it për sistemin prokurorial

Prishtinë, 27 shkurt 2024

Realizmi i aktiviteteve dhe diskutimi i planeve strategjike dhe ideve për të zhvilluar më tej mbështetjen nga projekti EUKOJUST, ishin temë diskutimi e Kryesuesit të KPK-së, z.Ardian Hajdaraj, Zëvendëskryesueses së KPK-së, znj.Jehona Grantolli dhe Drejtorit të Përgjithshëm të SKPK-së, z.Sami Istrefi me drejtuesin e EUKOJUST-it, z.Volkmar Theobald dhe ekspertin e këtij projekti, z.Cristian Nicoara.

Me këtë rast, Kryesuesi i KPK-së, z.Hajdaraj, falënderoi drejtuesin e projektit EUKOJUST,

z.Theobald, për vizitën, duke theksuar se ky projekt i programit të BE-së për sektorin e drejtësisë në Kosovë ka ndihmuar në mënyrë të veçantë për zbatimin e objektivave strategjike të sistemit prokurorial.



Ndërkaq, drejtuesi i këtij projekti, falënderoi kryesuesin për pritjen, duke thënë se projekti do të vazhdojë të implementohet edhe më tej, në mënyrë që të kontribuohet dhe forcohet zbatimi i ligjit në Kosovë.

Këshilli Prokurorial i Kosovës dhe EUKOJUST-i, program i BE-së në sektorin e drejtësisë në vendin tonë, bashkëpunojnë ndër vite për fuqizimin e llogaridhënies, transparencës, profesionalizmit, cilësisë, efektivitetit, pavarësisë dhe paanësisë së sistemit prokurorial.

Kryesuesi Hajdaraj priti në takim Ambasadorin e Mbretërisë së Holandës në Kosovë, znj. Carin Lobbezoo

Prishtinë, 27 shkurt 2024

Mbështetja e projekteve për sistemin prokurorial, përfshirë zbatimin e Projektit të EUKOJUST-it përmes CILC-it, zbatimi i Kodit të Etikës për Prokurorë dhe hartimi i Planit të Integritetit të Sistemit Prokurorial (2024-2026), ishin disa nga temat që u trajtuan në takimin e Kryesuesit të Këshillit Prokurorial të Kosovës, z.Ardian Hajdaraj dhe Ambasadores së Mbretërisë së Holandës në Kosovë, znj. Carin Lobbezoo, e cila



shoqërohej nga Koordinatorin Rajonal të Sundimit të Ligjit, z. Bart de Bruijn dhe Zyrtarja e Lartë e Sundimit

të Ligjit, znj.Venera Ramaj.Më këtë rast, Kryesuesi Hajdaraj falënderoi Ambasadorin Lobbezoo për vizitën e saj dhe për mbështetjen tejet të çmueshme që ka dhënë Holanda për fuqizimin e sistemit prokurorial dhe sundimit të ligjit në vendin tonë, si pjesë të një procesi të pashmangshëm të integrimit evropian, si dhe e njoftoi atë për përmbushjen e detyrave të Këshillit, planet e tij dhe sfidat që ekzistojnë në rrugën përpara.



Nga ana tjetër, Ambasadorja Lobbezoo falënderoi Kryesuesin Hajdaraj për pritjen, duke theksuar se misioni diplomatik që përfaqëson dhe vendi i saj do ta mbështesin sistemin prokurorial me anë të projekteve zhvillimore dhe do të angazhohet që bashkëpunimi ndërmjet tyre të thellohet edhe më tej, përfshirë respektimin dhe funksionimin e pavarur, të paanshëm dhe profesional të tyre.

Në përfundim të takimit, Hajdaraj-Lobbezoo, të dyja palët janë zotuar për krijimin e partneritetit të vazhdueshëm, duke intensifikuar format dhe mënyrat e bashkëpunimit në mes të sistemit prokurorial dhe Ambasadës Holandeze.

Mbahet punëtori për prezantimin, diskutimin dhe finalizimin e draftit të Rregullores për Zyrën për Mbrojtje dhe Ndihmë Viktimave

Prishtinë, 28 shkurt 2024

Komisioni për Çështje Normative i Këshillit Prokurorial të Kosovës, i udhëhequr nga prokurori Armend Zenelaj, i mbështetur nga Programi i Departamentit të Drejtësisë për Ndihmë, Trajnim dhe Zhvillim Prokurorial Jashtë Vendlindit (OPDAT), ka organizuar një punëtori për prezantimin, diskutimin dhe finalizimin e draftit të Rregullores për Zyrën për Mbrojtje dhe Ndihmë Viktimave.

Në këtë punëtori morën pjesë Kryesuesi i KPK-së, Ardian Hajdaraj, Zëvendëskryesuesja Jehona Grantolli, anëtarë të KPK-së, Drejtori i Përgjithshëm i

SKPK-së, zyrtarë të ZMNV-së, përfaqësues të OPDAT-it nga Ambasada Amerikane dhe të projektit EUKOJUST.



Në këtë punëtori është diskutuar për draftin e Rregullores për Mandatin, Strukturën, Funkcionimin dhe Organizimin e Zyrës për Mbrojtje dhe Ndihmë Viktimave, me ç'rast që në fillim u tha se një vëmendje e veçantë do t'u kushtohet qëllimeve, fushëveprimit, parimeve dhe kompetencave të ZMNV-së, zyrë kjo, e cila funksionon e pavarur në Zyrën e Kryeprokurorit të Shtetit.

Gjithashtu, në fokus të sesioneve të punëtorisë, ishte shqyrtimi i rolit dhe strukturës organizative të zyrave regjionale dhe trajtimi i funksionimit dhe i organizimit të ZMNV-së gjatë ofrimit të mbështetjes dhe përfaqësimit të viktimave të dhunës në prokurori dhe gjykata.

ZMNV-ja ofron shërbime për viktimat e krimit gjatë procedurave ligjore dhe përfaqëson interesa e tyre në sistemin e drejtësisë penale në rastet e parapara me ligj edhe për çështje civile.

Drejtori i Përgjithshëm i Sekretariatit të KPK-së priti në takim njohës Koordinatorin Rajonal të Sundimit të Ligjit, z.Bart de Brujin

Prishtinë, 29 shkurt 2024

Drejtori i Përgjithshëm i Sekretariatit të KPK-së, z.Sami Istrefi, priti në një takim njohës Koordinatorin Rajonal të Sundimit të Ligjit, z. Bart de Brujin dhe Zyrtaren e Lartë të Sundimit të Ligjit, znj.Venera Ramaj, të Ambasadës së Mbretërisë së Holandës në Prishtinë.

Drejtori i Përgjithshëm, z.Istrefi, falënderoi koordinatorin De Brujin për vizitën e tij dhe shpallti prioritetet dhe objektivat për funksionalizimin dhe avancimin e sektorit të administratës së Këshillit Prokurorial dhe Institucionit të Prokurorit të Shtetit, duke theksuar nevojën e mbështetjes së mëtejshme nga ana e Ambasadës së Holandës në Kosovë.

“Jemi jashtëzakonisht të interesuar, ndër të tjera, për të fuqizuar edhe transparencën publike dhe për të përmirësuar besueshmërinë dhe perceptimin e publikut në sistemin prokurorial”, tha më këtë rast Drejtori Istrefi.

Nga ana tjetër, Koordinatori Rajonal për Sundim të Ligjit, z. Bart de Brujin, falënderoi Drejtorin e Përgjithshëm, z.Sami Istrefi, për pritjen, duke nënvizuar se përkrahja dhe mbështetja e tyre do të realizohet përmes projekteve të ndryshme që ndërlihen me ngritjen dhe fuqizimin e kapaciteteve të administratës së sistemit prokurorial.



Në përfundim të takimit, bashkëbiseduesit janë shprehur për forcimin e bashkëpunimit të nevojshëm, në mënyrë që përmes mbështetjes së sektorit të administratës të ndihmohet edhe avancohet sundimi i ligjit në Kosovë.

